

明醫雜著



明醫雜著卷之四

吳郡後學薛已

風症

問左手臂攣縮不能伸舉手指拳縮肩背重墜
有似筋牽引作痛伸縮間骨節處筋作痛左足
大指中指常欲反張難屈左手指掌時常作麻
指縫近掌處但覺有物夾於其間左足底近前
高突處如腫硬急脹摸之無形步履時只多如
一羶墊者語言短澁拜起頭暈口眼喎斜舌根
痰纏胸膈痰礙咽中有痰核左肋下有痰核不

時打寒噤噫噴呵欠便牽動手足之病左耳左面左体使手或粗衣摸擦則皮膚痛左腮左項左脇肋皆時常木而急如有物粘貼其上左体或頭項或手足作痒左眼時常有淚流凝不乾左口角似寬縱左面上似蟲蟻遊行被風吹襲左鼻孔清涕出即打噫噴等症

荅大經小絡貫串一身謂之脉脉者血之隧道也血隨氣行周流無停筋者周布四肢百節絡聯而束縛之此屬肝木得血以養之則和柔緩而不急脉皆起於手足指端故十二經皆以手

足名之而筋則無處無之皮毛者屬肺主外而
易於感冒人身之血行於脉絡而外充於皮毛
滲透肌肉滋養筋骨故百體和運動無礙若氣
滯則血滯氣逆則血逆得熱則瘀濁得寒則凝
泣衰耗則運行不周滲透不徧而外邪易侵矣
津液者血之餘行乎脉外流通一身如天之清
露若血濁氣滯則凝聚而爲痰痰乃津液之變
如天之露也故云痰遍身上下無處不到蓋即
津液之在周身者津液生於脾胃水穀所乘濁
則爲痰故痰生於脾土也所以古人論中風偏

枯麻木酸痛不舉諸症以血虛死血痰飲爲言
是論其致病之根源至其得病則必有所感觸
或因風或因寒或因濕或因酒或因七情或勞
力勞心房勞汗出因感風寒濕氣遂成此病此
血病痰病爲本而外邪爲標其病中於皮毛血
脉經絡肌肉筋骨之間而未入臟腑故邪在皮
毛肌肉則不知痛痒麻木不仁如有物一重貼
於其上或如蟲遊行或洒洒寒慄或腫脹或自
汗遇熱則或痒遇陰虛則沉重酸痛邪入血脉
經絡則手足指掌肩背腰膝重硬不遂難於屈

伸舉動或走注疼痛所陳諸症皆外自皮毛以至筋骨之病凡脉所經所絡筋所會所結血氣津液所行之處皆凝滯鬱遏不得流通而致然也亦何必一一強度某病屬某經某病屬某臟而雜治之哉若邪入臟腑則爲危病而難於用藥東垣書論之明矣經云知其要者一言而終不知其要流散無窮此之謂也

愚按難經曰邪在氣氣爲是動邪在血血爲所生病經云陽之氣以天地之疾風名之此風非外來風邪乃木氣病也故諸方多言皆

由氣體虛弱榮衛失調或七情過度以致真
氣耗散腠理不密邪氣乘虛而入及其中
然左半體者肝腎所居之地肝主筋腎主骨
肝藏血腎藏精精血枯槁不能滋養故筋骨
偏廢而不用也河間曰風病多因熱甚俗云
風者言末而忘其本也經云汗出偏沮使人
偏枯如樹木一枝津液不到則此枝枯槁被
風所害由此觀之實因肝腎二經精血枯槁
之所致也前症云云亦當察其形症審其兼
變而治之尤不可泥執于風經曰三陰三陽

發病爲偏枯痿易四肢不舉亦未嘗必指於
風也其真中者當辨其中藏中府而治之
瞽者中於肝舌不能言者中於心唇緩便秘
者中於脾鼻塞者中於肺耳聾者中於腎此
五者病深多爲難治中血脉者外無六經之
形症內無便溺之阻隔肢不能舉口不能言
用大秦朮湯主之中腑者多兼中臟如左關
脉浮弦面目青左脇偏痛筋脉拘急目瞤頭
目眩手足不收坐踞不得此中胆兼中肝也
用犀角散之類如左寸脉浮洪面赤汗多惡

風心神顛倒言語蹇澁舌強口乾忪悸恍惚
此中小腸兼中心也用麻黃散之類如右關
脉浮緩或浮大面唇黃汗多惡風口喎語澁
身重怠惰嗜卧肌膚不仁皮肉瞤動腹脹不
食此中胃兼中脾也用防風散之類如右寸
脉浮濇而短必鼻流清涕多喘胸中冒悶短
氣自汗聲嘶四肢痿弱此中大腸兼中肺也
用五味子湯之類如左尺脉浮滑面目顴黑
腰脊痛引小腹不能俛仰兩耳虛鳴骨節疼
痛痿痺善恐此中膀胱兼中腎也用獨活散

之類此皆言真中風之症治也其間亦有氣
血之分焉氣虛而中者右手足不仁用六
子湯加釣藤薑汁竹瀝血虛而中者左手足
不仁用四物湯加釣藤竹瀝薑汁氣血俱虛
而中者左右手足皆不仁用八珍湯加釣藤
薑汁竹瀝其與中風相類者不可不別如中
於寒謂冬月卒中寒氣昏冒口禁肢攣惡寒
脉浮緊用麻黃桂枝理中湯之類中於暑謂
夏月卒冒炎暑昏冒痿厥吐瀉喘滿用十味
香薷飲之類中於濕丹溪所謂因濕土生痰

痰生熱熱生風也用清燥湯之類加竹瀝薑
汁因於火者河間謂五志過極火盛水衰熱
氣怫鬱昏冒而卒仆也用六味丸四君子湯
獨參湯之類內有恚怒傷肝陰火上炎者用
小柴胡湯之類中於氣者由七情過極氣厥
昏冒或牙關緊急用蘇合香丸之類食厥者
過於飲食胃氣不能運行故昏冒也用六君
子加木香勞傷者過於勞役耗損元氣脾胃
虛弱不任風寒故昏冒也用補中益氣湯房
勞者因腎虛耗氣不歸源故昏冒也用六味

凡此皆類於中風者也夫中風者內經主於風此真中風也若河間主於火東垣主於氣丹溪主於濕皆是因火因氣因濕而爲暴病暴死之症類中風而非真中風也治者審之卒中昏憤口眼喎斜痰氣上湧咽喉有聲六腑沉伏此真氣虛而風邪所乘以三生飲一兩加人參一兩煎服即甦若遺尿手撒口開鼾睡爲不治用前藥亦有得生者三生飲乃行經絡治寒痰之藥有斬關奪旗之功每服必用人參兩許以祛其邪而補助真氣否則

不惟無益適足以取敗矣觀先哲用芪附參
附等湯其義可見○大尹劉孟春素有痰雨
臂頑麻兩目流淚服祛風化痰藥痰愈其臂
反痛不能伸手指俱攣余曰麻屬氣虛誤服
前藥肝火熾盛肝血乾涸筋無所養虛而攣
耳當補脾肺滋腎水則風自息熱自退痰自
清遂用六味地黃丸補中益氣湯不三月而
痊○一儒者素勤苦惡風寒鼻流清涕寒噤
噴嚏屬脾肺氣虛反服祛風之藥肢體麻倦
痰涎自出殊類風症余以爲風劑耗散元氣

除火乘其上位以補中益氣湯加麥門五味
子治之而愈○舉人于尚之素腎虛積勞起
痿不能步履後舌瘡不能言面色黧黑余謂
腎氣虛寒不能運及所發用地黃飲子治之
而愈後不慎調攝而復作或用牛黃清心丸
之類發熱痰甚誠似中風用祛風化痰之類
小便秘澀口舌乾燥仍用前飲及加減八味
丸漸愈又用補中益氣湯而痊○一膏梁之
人素不慎起居忽失音不能語神思昏憤痰
涎上壅余謂河間云夫瘡屬腎經虛寒其氣

厥不至醫學綱目云少陰氣至則齧舌少陽
氣至則齧頰今失音腎氣不能上接清陽之
氣也不信仍用風藥後齧舌始信余言先用
地黃飲子及六味地黃丸而愈○儀部素補
之患前症不信余言數服祛痰之劑後齧舌
而歿○一男子體肥善飲古本強語溢痰壅
口眼喎斜肢體不遂余謂脾虛濕熱痰涎所
致用六君子煨乾葛山柰神麴而愈○外舅
年六十餘素善飲兩臂作痲余曰此脾虛有
濕也不信恪服祛風治痿之藥更加麻木發

熱體軟痰壅脹拘痛口禁語流頭目暈
口角寬縱痰涎流出兩月後遍身如蟲行
起白屑始信余曰臂麻體軟脾無用也痰涎
湧出脾不能攝也口斜語澁脾氣傷也頭目
暈重脾氣不升也痒起白屑脾氣不能營也
遂用補中益氣湯加神麴半夏茯苓三十餘
劑諸症悉愈又用參朮膏而痊○一男子元
氣素弱或頭目眩暈或肢體倦熱仲夏因勞
役飲食不時兩手麻木肢體倦怠余以爲暑
熱傷元氣用人參益氣湯而愈○一男子卒

中口眼喎斜言語不出惡見風寒四肢拘急
脉浮而紫此屬脾胃受症故舌本強而不能
言用秦艽升麻湯治之稍愈乃以補中益氣
湯加山梔治之而痊○一婦人懷抱鬱結筋
攣骨痛喉間似有一核服烏藥順氣等藥口
眼歪斜臂難伸舉痰涎愈多內熱晡熱食少
體倦余以鬱火傷脾血燥生風用加味歸脾
湯加丹皮山梔二十餘劑形體漸健飲食漸
加又用加味逍遙散十餘劑痰熱少退喉核
少消更用升陽益胃湯數劑諸症漸愈但體